

Germ. 46  
210

R

Germ. Spec.  
310.

3

DE  
ANTIQUISSIMO  
VRBIS GRIMAE  
STATV

---

BREVI COMMENTATIONE  
EX  
VETERVM MONIMENTIS  
DISSERIT

M. HENRICVS AVGVSTVS  
SCHVMACHERVS

GYMNASII ILLVSTRIS GRIMENSIS CONRECTOR.

---

LIPSIÆ  
EX OFFICINA LANGENHEMIANA  
MDCCXXV.

Bayrische  
Staatsbibliothek  
München



## D E ANTIQUISSIMO VRBIS GRIMAE STATV.

### §. I.



On satis mirari possum quorundam rerum Germanicarum, et in primis Misnicarum, Scriptorum temeritatem, qui, urbium Germaniae, et terrae Misnicae, originem et antiquitatem, a temporibus natiuitatis Christi, Seruatoris generis humani optimi, et vltra ea, repetendam esse, existimant. Qui historiarum conditores, si monumentis, fide dignis, et testimoniis probatorum scriptorum, suam confirmarent sententiam, nemo non eis fidem facile adhiberet. Quia vero sine antiquissimorum auctoritate scriptorum loquuntur, et, quae in medium proferunt, nullis argumentis comprobare solent, mera esse figmenta, et inanes fabulas, nullis, neque peregrinis, neque domesticis, monumentis subnixas, antiquam repetituris memoriam illico patebit. In horum numerum referendum omnino censeo LAURENTIVM PECCENSTEINIVM, auctorem rerum, in patria gestarum, satis celebrem, qui, in Poliographia Saxoniae, Misniae et Thuringiae, a) affirmat: insignem sua aetate fuisse virum, antiquitatum indagatorem solertissimum, qui, in antiquissimo documento MSto, in Cella veteri, quondam viso et lecto, haec verba, de duabus Misniae urbibus antiquissimis consignata, inuenerit:

*Hayn und Grim, die beyden ältesten Städte in Osterland,  
Sind allerdinge vor Christi Geburt bekannt.*

A 2

§. II. Quod

*a) Part. III.  
Theatr. Sax.  
pag. 72.*

## §. II.

Quod si vero huius insignis et eximii Viri nomen produxisset, vel documentum in Cella veteri olim visum protulisset modo dictus PECCENSTEINIVS, rem Historico dignam fecisset. Aliorum enim relationibus et commemorationibus fidem habere non licet in rebus, ante multa seculagestis, quas neque oculis vidimus, neque ex monumentis percepimus. Et, quamvis multa eiusmodi in scriptis huius auctoris reperias, quae castiganda sunt, et iam dudum a viris celeberrimis sit demon-

b) *vid. illustris Schurzschewitschius, in disput. de March. Misnens. p. 1.* stratum, b) longe eum infra ALBINVM, et GEORGIVM FABRICIVM, esse; sunt tamen non pauci, qui, verbis huius scriptoris inhaerentes, hanc sententiam, de antiquitate urbium Grimae et Haynae, ultra natiuitatem Christi repetenda, sine ullo argumento et testimonio, aliis obtrudere conantur. Ex

c) *An. 1663. 4to.* quibus duos tantummodo, ut brevis sim, proferam, SEBASTIANVM MANNVM, qui in descriptione Haynae, c) urbis suae patriae antiquitatem, ex hoc adducto rhythmo, in Cella veteri quondam reperto, probare contendit, itemque IO.

CONRADVM CNAVTHIVM, qui, vestigia horum secutus, iisdem uti verbis non dubitauit. d) Alios iam tacitus praeter-

e) *in prodro-mo Misniae p. 193.* eo, qui, auctoritate horum decepti, vel literis hanc opinionem, falso conceptam, prodere, vel, in conspectu praestantissimorum virorum, proferre, non erubescunt. Ego eadem verba ex ore viri grauis et conspicui, sed omnis historiae imperti, percepi, qui, aliquot abhinc annis, in conspectu summi aulae Saxonicae Ministri, quem Deus in salutem patriae conseruet, per hanc urbem iter facturi, antiquitatem urbis Grimae hoc modo confirmare non dubitabat: Domine Excellentissime, haec turris, quae arci Grimenensi contigua, iam ante natum Christum condita est. Qui Minister, auctoritate praeditus, subridens paucis respondebat: *quidni ante mundum conditum?* Atque sic satis declarabat, vanas et aniles esse fabulas, in Historiis, sine veterum testimoniis, pro certo aliquid asserere. In Osterlandia urbes has duas antiquissimas, a PECCENSTEINIO commemoratas, sitas fuisse, nemo fere dubitat. Erat enim Osterlandia regio Saxoniae superioris inter fluuios, Salam et Muldam, a fontibus Elystri incipiens, desinensque circa Halas et Martis-

bur-

burgum, ita dicta ratione Thuringorum, quibus Orientem versus finitima, vnde nonnullis Ostfuringia, siue Ostlandia, nominatur, de qua re conferenda est dissertatio de veteri Osterlandia, quam celeberrimus D. ADAMVS RECHENBERGIUS habuit. e)

c) Lips. 1691.

### §. III.

Quibus fabulis, de vrbis Grimae antiquitate, de qua in primis mihi iam sermo erit, a temporibus natiuitatis Seruatoris nostri repetenda, tantum abest, vt accedam, vt potius, ex rerum gestarum conditoribus, si non ante, tamen breui post natum Christum degentibus, historiasque fide dignas consignatibus, satis dilucide probare queam, antiquissimis Germanis nullas iis temporibus vrbes munitas fuisse, sed dispersos habitasse illos, et vicos tantum incoluisse. Testem huius rei, omni exceptione maiorem, C. CORNELIVM TACITVM produco, qui inter Romanos quidem vixit, res tamen Germanicas non ignorauit, quas ex consuetudine cum Germanis, et multis variisque bellis acerrimis, ab vtraque gente susceptis, percipere potuit. Hic, in elegantissimo libro, de Germania, siue, de situ et moribus populi Romani, f) aperte inquit: *Nullas Germanorum populi vrbes habitari, satis notum est, ne pati quidem inter se iunctas sedes. Colunt discreti et diuersi, vt fons, vt campus, vt nemus, placuit. Vicos locant, non in nostrum (Romanorum) morem connexis et cohaerentibus aedificiis suam quisque domum spatio circumdat, siue aduersus casus ignis remedium, siue inscitia aedificandi.*

### §. IV.

Quae Germania cum iam ante Taciti tempora, et quidem C. Iulii Caesaris, in Gallia tum versantis, aetate, in *Cisrhenanam* et *Transrhenanam* diuisa fuerit, prout ex libro quarto, g) cap. XVI. de Bello Gallico, patet, non immerito quaeritur, de qua Germania TACITVS hoc loco loquatur, in qua nullas fuisse vrbes feribit? De Germania Transrhenana, ratione Galliae ita dicta, in qua tum temporis viuebant Romani, quae etiam *Germania magna* appellatur, TACITO sermonem esse, argumentis satis claris et perspicuis demonstrarunt iam dudum doctissimi viri, et, inter eos, Polyhistor excellentissimus, HERMANNVS CON-

- RINGIVS, in elegantissima de urbibus Germanicis exercitatione, Helmstadii habita, h) et celeberrimus BYRGARDVS GOTTHELF STRVVVS, in Historia Romani Imperii Germanici, patrio sermone edita. i) In ea vero Germania, quae Romanis, ratione Galliae, in qua bella eo tempore gerebant, *Cisrhenana* dicta, et nobis, contra, *Transrhenana* vocatur Germanis, Germaniae fines incolentibus, urbes omnino fuisse, ipse TACITVS non semel alibi prodidit. Negandum quidem non est, sed ingenue fatendum: nonnullos scriptores existimare, auctoritate fretos IVLII CAESARIS, in Libro de Bello Gallico et k) CLAVDII PTOLEMAEI, quem post Taciti tempora, et quidem aetate Antonini, Geographica conscripssisse, constat, etiam in *Transrhenana Germania*, prout Romanis appellata fuit, urbes tunc temporis fuisse, quas ego illi iam detractas volui. Commemoratus enim IVLIVS CAESAR et Sueuis, et Vbiis, qui non possunt non inter Transrhenanos, ex habitatione Romanorum, referri, sua attribuit oppida, iniquiens l): *Sueuos, postquam, per exploratores, pontem fieri, comperissent, more suo, consilio habito, nuntios in omnes partes dimisisse, uti de oppidis demigrarent, liberos, uxores, suaque omnia, in silvas deponerent.* Idem Vbiis imperat, m) ut pecora deducant, suaque omnia ex agris in oppida conferant. Et PTOLEMAEVS vel nonaginta loca Germaniae magnae, siue Transrhenanae, ratione Romanorum, recenset, *πόλεις* nomine. Sed ad haec iam olim antiquitatum peritissimi responderunt viri, per *πόλεις* non oppida bene munita, in qua quidem significatione saepe auctores adhibent, sed, hoc loco, vicos, minus munitos, vel loca, nullis muris cincta, et facile euertenda, denotasse Ptolemaeum. Id quod in primis ex testimonio Herodiani probare contendunt, qui, in Historia rerum Maximini, n) ait: *Vicos omnes (κόμης) militibus incendendos diripiendosque concessit.* Addit statim causam: *namque oppida eorum (πόλεις αὐτῶν) et aedificia omnia, ignis facile consumit.* Exinde ergo liquet, per *πόλεις*, auctorem hunc *κόμης* denotasse.

## §. V.

Ad terras potius, quas his temporibus inhabitamus, Mithras progredior, urbes eius antiquissimas, ante Christum natum



tum, conditas, perquisiturus. Vt vero ordine omnia conficiam, quae ad hoc pertinent argumentum, primo loco mihi de populis antiquissimis dicendum est, Misniam, ita hac aetate dictam, incolentibus, et tum facile de vrbibus huius regionis iudicare licebit. Ante et circa tempora Christi Hermunduros, Sueuorum reliquias, has terras obtinuissē, nemini ignotum est. o) De huius populi appellatione multi multa proferunt. Sunt, qui ab Hiera, vel Gera, fluuio Thuringiam secante mediam, dictos credunt quasi Hieramunduros. Alii, a filua Hercinia, Hartzmannos vocant. p) Nonnulli ab exercitu et armis, nomen traxisse, scribunt, et Heermannos, siue bellicosos, a Romanis appellatos contendunt, de qua re legendus est ZACHARIAS SCHNEIDERVS, in Chronico Lipsiensi. De aliorum deriuationibus nihil, in praesentia, dicam. Quas vero terras, praeter Misnicas, obtinuerint, et quam late habitauerint Hermunduri, non vna, sed multiplex, et varia, scriptorum antiquissimorum, ex quibus de sede eorum iudicandum, est sententia. Ad Albim, et quidem transfluuium, versus ortum solis, eos habitasse, confirmat STRABO, qui aetate Augusti, Romanorum Caesaris, vixit, in Geographia q) cum inquit: Μέρος δὲ τῆς αὐτῆς (Σαξωνίας) καὶ πέραν τῆς Ἀλβίου νέμεται, καθότι οὗτοι Ἑρμόνδοροι (legendum Ἐρμόνδοροι) καὶ Λαγκίσταργοι. Si ergo Longobardis fuerunt proximi iam commemorati Hermunduri, et, vna cum his, suis sedibus trans Albim eiectioni et expulsi sunt, sine dubio a Semnonibus, qui maximam Germaniae partem iis temporibus in sua potestate habuerunt; non immerito inde colligunt clarissimi spicilegii curiosi Superioris Saxoniae, r) Longobardos, in Ducatu Magdeburgico, versus Marchiam Brandenburgicam, Hermunduros vero vicinos, in Ducatu Anhaltino, et aliis circumiacentibus regionibus; habitasse. VELLEIVS PATERCVLVVS Hermundurorum fines quoque descripsit, qui, capite centesimo sexto libri secundi, Albim Semnonum et Hermundurorum fines praeterfluere, observauit. Neque minus CORNELIVS TACITVS huius rei mentionem fecit, qui, Hermunduros proximos Ligiis, id est Silesiis, vt Hanckius de Silesiorum nominibus interpretatur, fuisse scribit s) cum ait: Iazyges, obsidionis impatientes, et proximos per campos vagi, accessitu-

o) vid. Albin Chron. Misn. p. 39.

p) vid. Weisk. in antiquit. Misn. Saxon. p. 2a.

q) Lib. VII. Prim. p. 339. Edit. Basil.

r) Part. I. pag. 3.

s) Annal. L. XII. c. 30.

*cessitudinem pugnae attulere, quia Ligius Hermundurusque illi ingruerant.* Idem quoque, Catts vicinos fuisse, et certamen inter Catts et Hermunduros de Salinis, sine dubio Halensibus, vt Cellarius existimat, in Geographia, ortum, et illos infelices, hos vero superiores discessisse, commemorat. t)

t) *Annal. L. XIII. c. 57.*

#### §. VI.

Facile ex his patet, Hermunduros ab Albi ad Salam vsque habitasse. Quia vero Albim, inclytum et notum flumen, in Hermundurorum finibus oriri, Tacitus scribit; u) in eo errasse hunc auctorem, PHILIPPVS CLVVERIVS, in Geographia antiqua, w) existimat, eo, quod in fine capitis haec addiderit verba: *Nunc tantum auditur.* Albim potius ab ortu Hermunduros Septentrionales finisse, Australes iuga Bohemica, siue montes Sudetum, et limites Nariscorum, putat. Hos igitur terminos dat Hermunduris modo dictus CLVVERIVS: Quicquid inter Salam et Albim est, pars Anhaltini Principatus Ducatusque Saxonici, Misnia fere tota, Voigtlandia tota, Coburgensis Ducatus pars, Brandenburgicae ditionis oppida, Culmbach, Cronach, Bareyth, Franconiae pars, ad laeuam Moeni ripam, haec omnia ad Hermunduros spectant. Sed multa de Silesiis, et aliis, omisit. Paucis verbis rem omnem complexus est CHRISTOPHORVS CELLARIVS, in Geographia

x) *p. 434.*

antiqua, x) vir in hoc studiorum genere incomparabilis: *Proximi, inquit, a Danubio sunt Hermunduri, per longo tractu, ad Salam vsque confluentem, habitantes.* Clarissimi auctores spicilegii Saxoniae superioris, parte prima, existimant: Hermunduros aliquamdiu trans Albim sedem habuisse, et hunc fluuium per fines eorum transisse: postea vero, scribunt, distractos fuisse, et partem eorum ad fines Silesiorum abiisse, ibique vsque ad tempora Constantini, permanuisse, alios vero, Septentrionalem Misniae partem ingressos, cum Catts decertasse. Sed de vrbibus, ab Hermunduris, ea aetate, conditis, ne vllum quidem apud Scriptores antiquissimos vestigium apparet. Vnum huius rei testem STRABONEM produco, qui, vt de aliis rebus, ita de Hermunduris, et vicinis populis, qui, in his terris habitant, in Geographia y) inquit: *Hermunduri ab vno in alium migrare locum solent, et vilissimo vitae genere vtuntur, nullam agri-*

y) *Lib. VII.*

*agriculturae et pretiosae suppellectilis curam agentes. Habitant in casis, quas in dies nouas exstruere possunt, quocunque veniunt, ea in loca migrare solent facile, quae largiores et copiosiores pastus pecoribus praebent, suaeque omnia, quae habent, curui, cum discedunt in alium locum, imponunt.*

## §. VII.

Quae cum clara satis et perspicua sint, quisque facile iudicabit, *Grimam* ab Hermunduris, aetate Christi, minus conditam esse. Qui populi nullam oppidi, nedum vici, aedificandi, cogitationem vnquam susceperunt, quibus, per superiorum edicta, neque cum pluribus, ad habitandum, vnum in locum coire licebat, et raro eodem in loco diu morati, ne scilicet, agriculturae studio, vsum belli intermitterent, et, sub recto, bene munito, delicatius et mollius paulo viuentes, languescerent et effeminarentur. Discreti ergo, vt ex CORNELIO TACITO iam supra demonstratum, sicut in Germaniae locis, ita in agro Grimenfi, natura bono, et ad pascendum pecudes bono, sine vicis et oppidis habitauerunt, fluuii et nemoris amoenitate, ab ortu solis, incitati. Quae cum alio loco rectius meliusque secum reputaret PECCENSTEINIUS, sui oblitus, scribit: z) *Einnahl ist gewiß und unläugbar, daß bey der z) Poliegr. Hermundurorum Zeiten wohl keine bemaurete Städte dieses P. 52. Orts gewesen, und erst mit der Wenden Ankunfft angefangen. Denn aus den Historien wissend, daß die vorigen Einwohner nur bloß auf Dörfern, oder in offenen Marckt-Flecken, gewohnet, welche sie pagos genennet, jedoch einem jeden seinen gewissen Refter zugetheilet.*

## §. VIII.

Qui Hermunduri etsi seculo primo, a Christo nato, in suis sedibus pacem et amicitiam cum Romanis coluerint, cuius rei testis est CORNELIUS TACITVS, in Germania scribens: a) *a) cap. 41. prope Sueuos est Hermundurorum ciuitas fida Romanis: eoque Germanorum non in ripa commercium, sed penitus, atque in splendidissima Rhetiae Prouinciæ colonia. Passim sine custode transeunt, et, cum ceteris gentibus arma modo, castraque nostra ostendamus, his domos villasque patefecimus non concupiscentibus;*

B

sub

sub Antonino tamen Philosopho, Imperatore Romanorum, seculo secundo, una cum vicinis Germaniae populis, lites et contentiones cum Romanis aluerunt, et ab eis victi superati-  
 que leguntur. Quod testatur *Capitolinus*, in Antonino Philo-  
 sopho. b) *Gentes omnes, ab Illyrici limite usque Galliam, conspirauerunt contra Romanos, ut Marcomanni, Narsi, Hermunduri, Quadi, Sueui, Sarmatae.* Seculo quarto eorum adhuc fit a scriptoribus mentio, temporibus Constantini Magni. Cum enim Gebericus, Gothorum Rex, cum Vandalis bellum gereret, fines horum a *Iornande*, de rebus  
 Geticis, c) ita describuntur, ut Hermunduri pariter occurrant, dicendo: *Erant namque Vandalis tunc ab Oriente Gothi, ab Occidente Marcomanni, a Septentrione Ermunduli (Hermunduri) a meridie Hiser, qui et Danubius appellatur.* De vrbibus vero Hermundurorum, hac aetate conditis, silent rerum gestarum conditores, neque vllum apud eos vrbis Grimae vestigiumprehenditur.

## §. IX.

Iis, quae secuta sunt, seculis, a scriptoribus antiquissimis peregrini populi, *Sorabi*, orti Sclauorum genere, in his ter-  
 ris commemorantur, qui, Hermundurorum fines, nomine eorum plane oppresso, ingressi, ditiones quoque, quas hi obtinuerant, in suam redigere potestatem sunt ausi. Ab hac quidem sententia discedit celeberrimus RECHENBERGIUS, in Dissertatione, de veteri Osterlandia, existimans: *vetus Hermundurorum nomen in Duringos, siue, Thuringos, abiit, syllabis duabus ab initio, ob celeritatem in efferendo, abiectis, atque duri, in voce Hermunduri, in ingimutato, sicut quoque in aliis nominibus gentilitiis ita fieri consuevit apud Francos; quando pro Merouei, Merouingi, Caroli, Carolingi, Lotharii, Lotharingi, substituerunt.* Quem secutus est WEISIVS, in antiquitatibus Misnico-Saxonicis, d) qui Thuringos Hermundurorum filios appellat, et syllabam *ing* progeniem notasse, pluribus exemplis confirmare contendit. Sed Thuringos, siue Duringos, eadem, qua Hermunduros aetate floruisse, ex  
 GETIO RENATO, e) et Thuringiam simul Septentrionalem  
 trans

b) cap. 22.

c) cap. XXII.

d) pag. 37.

e) Lib. IV.

c. 6.

trans Vnstrutum, et Ockeram, Australem ab Vnstruto ad Moe-  
num, Orientalem ad Salam, Occidentalem ad VVerram, sitam  
fuisse, ex multis antiquissimis scriptoribus, probat celeberrimus SPENERVS, in Notitia Germaniae mediæ æui. f)

f) p. 439.

## §. X.

Qui Hermunduri, de quibus supra dictum est, sedes,  
quas obtinuerant, retinentes, neque amplius cum Romanis  
bella gerentes, otio vsi sunt et tranquillitate, vsque ad impres-  
sionem peregrini illius populi Sarmatici, qui generali nomi-  
ne, *Slau*, *Sclau*, *Sclau*, *Venedi*: speciali vero, *Serui*, *Serbi*,  
*Sorabi*, vocati sunt, quemadmodum Venedi, Lusitani partem  
nostra ætate incolentes, se ipsos *Serbie* appellant. Variis et-  
iam nominibus, prout diuersas inhabitauerunt terras, hi Vene-  
di discreti fuerunt. Dicti sunt Bohemi, qui Boiohemum  
retinuerunt: Maharenfes, qui ad Marum, postea Maharum  
appellatum, accoluerunt: ad Salam vsque sedem habentes, *Sorabi*  
dicti sunt. Nunc dispiciendum est, quibus ex locis in  
has terras venerint hi populi. Meminit eorum CLAVDIVS  
PTOLEMAEVS, in Geographia, g) qui temporibus Caesaris g) *Lib. V. c. 9.*  
Augusti, vixit, et sedem iis inter montes Ceraunios, et flu-  
men Rha, vel Wolga, attribuit. C. PLINIVS SECVNDVS,  
eiusdem ætatis scriptor, Serbos eis annunciat populis, h) *h) Hist. Na-  
tur. Lib. VI.  
cap. 7.*  
qui propè paludem Moeotidis habitauerunt, inquit: *Inde  
Maeotis lacus in Europa dictus. A Cimmerico accolunt Maeoti-  
ci, Vali, Serbi, Arrechi, Zingi etc.* Inde, finibus suis egressi, in  
Europam, et quidem in Seruiam, amplissimam olim provin-  
ciam, se contulerunt, de qua migratione legendus est CON-  
STANTINVS Porphyrogenetus, de administrando imperio, i) *i) cap. 31.*  
qui ait: *Sciendum est, Seruios oriundos esse a Seruiis non bap-  
tizatis, qui etiam Albi cognominantur, et ulteriora Turciae in-  
colunt, in loco ab iis Boici nuncupato, cui finitima Francia est,  
vbi et magna Chrobatia baptismi expers, quae etiam Alba cogno-  
minatur.* In illis ergo locis initio Seruii, de quibus sermo  
est, habitauerunt, Serbi quoque et Sorabi dicti. In has terras  
Misnigas, Salam inter et Albim sitas, per Morauiam et Bohe-  
miam, migrarunt illi, vt sedem et domicilium rerum for-

B 2

tuna-

tunarumque suarum ibi figerent, fertilitate agrorum delectati, vel, vt DAVID PEIFERVS, in Lipsia, ait, vt in terra suauis et amoena nidos construerent. DITMARVS MERSEBURGENSIS, qui rerum in Misnia olim gestarum peritissimus fuit, sub initium Libri primi Historiae suae, duo Soraborum genera in has regiones peruenisse, et campos, inter Albim et Salam sitos, occupasse, scribit: *Dalemincios* et *Milcienos*, a nominibus regionum suarum, quas antea in Dalmatia obtinuerant, facta vero migratione, dereliquerant, appellatos: et prouinciam *Daleminci*, ab Albi usque in Caminizi, fluuium, porrectam fuisse, *Milcienos* haud procul vrbe *Misni*, quam Henricus postea iuxta Albim condidit, et a fluuio *Misa* ita appellauit, totique regioni inde nomen dedit, habitasse, affirmat. Sunt non nulli, qui his *Luscos* annumerant, et, per eos *Lusatios* intelligendos, asserunt, de quibus, et de pago eorum, *Lucizi*, idem auctor, *Ditmarus*, Libro demum septimo, mentionem facit. Hi Sorabi, Dalmatia egressi, et oppidorum, et locorum, quae inhabitauerant, adhuc memoriam animis recolentes, et has terras inuadentes, prouinciam, et pagum, *Daleminzam*, eodem nomine appellare soliti sunt.

## §. XI.

Quo vero tempore hi Sorabi in has regiones irruptionem fecerint, de eo scriptores, qui de his aliquid memoriae prodiderunt, inter se non consentiunt. Ipsi Sorabi, rudes admodum, rerumque imperiti, nihil literarum monumentis de eo consignatum reliquerunt. Et, quos finitimos habebant, populi eadem incertia et oscitantia laborabant. Qua de re PETRVS ALBINVS, et GEORGIVS FABRICIVS, nihil certi de annis, quibus Misniam ingressi sint, affirmari posse, docent. Sunt non nulli, qui, sub finem Seculi quinti, vel sub initium sexti, has terras eos inuasisse, contendunt, inter quos est IACOBVS CAROLVS SPENERVS, qui, ex IORNANDE, Seculi sexti scriptore, et PAVLO DIAcono, in Notitia Germaniae antiquae, id confirmat. k) DAVID PEIFERVS, in Lipsia, ex SIFFRIDO Misnensi, probat, non nullos Ostfuringorum, circiter annum Christi DXII, ad Albim, non procul Mezbogo (Magde-

k) cap. IV.  
p. 38.

(Magdeburgo) adhuc sedisse, postea vero in vnam gentem cum Sorabis coaluisse, et Salinas Halenses occupasse, a Salis praestantia, *Dob rebore dictas.* \*) Celeberrimus RECHENBERGIUS, supra laudatus, de veteri Osterlandia, hanc Sclauorum migrationem anno CCCCLI, factam esse, ait: *Nobis quidem, in tanto scriptorum dissensu, de primo Sclauorum accessu, quid certi ponamus, non liquet. Sufficiat ergo, nosse, quod Hermundurorum presterint vestigia, Osterlandiam quoque hoc modo incolentes.* Hos Sclauos, seu Sarmatas, qui et aliis Sauromatae audiunt, terras olim coluisse amplissimas, in vtraque orbis parte, Europa et Asia, firmo stabilique consensu, Geographi pronunciant. Et, cum Attila, Hunnorum Rex et tyrannus famosissimus, superatis Sarmatis, Alanis, et Ostro-Gotbis, signa quoque infesta Francorum regno inferre molitus est, iunctis Sarmatarum, seu, Sclauorum Scytharumque populis, eodem tendit per Thuringiam, ingenti prorsus multitudine, vt septingenties mille homines exercitum cepisse, literis mandatum inueniamus. Expeditione hac confecta, in hiberna concessit in Duringiam, cum Sclauis, siue Sorabis, ibidemque longius subsistens, Sorabis, vt Osterlandiam, seu Osterlandiam, deinceps habitarent, causam praebuit, quod in annum natiuitatis Christi CCCCLI, iuxta quosdam, incidit. Huic sententiae accedunt clarissimi auctores spicilegii curiosi Historiae Saxoniae superioris, qui, 1) Sorabos cum Attila, Rege Hunnorum, in has regiones peruenisse, p. 192. eoque recedente, in iis remansisse, et sedem in iis fixisse, existimant, eo, quod ANNALISTA SAXO Hunnos antiquos Soraborum amicos appellitet, probetque, quod haec amicitia ex prima migratione in has terras contracta sit. M. CHRISTIANVS HENRICVS WEISIVS, sexto, post Christum natum, seculo, Sorabos, a Sclauis ortos, ex Sarmatia erumpentes, hanc regionem armis subegisse, et Sorabiam inde dictam, in antiquitatibus Misnico-Saxonicis, demonstrat. m)

m) p. II.

## §. XII.

Quamuis vero annum, quo in has terras venerint, definire, in tanto dissensu, minus liceat; id tamen certum est, vrbes munitas, ab antecessoribus conditas, Sorabos, in his locis,

cis, non deprehendisse. Nemo scriptorum antiquissimorum de iis aliquid commemorat, neque vlla coniectura colligi potest, ante tempora illorum munitas vrbes in Misnia fuisse, cum supra demonstratum sit, Hermunduros discretos in agris, sine vrbibus, habitasse. Ex variis tamen documentis probari potest, Sorabos Venedos in his oris quaedam castella, pro temporum illorum conditione, contra hostium impetus, condidisse, ex quibus vrbes, sequentibus temporibus, factae, quae, eadem nomina ab iis imposita, retinuerunt. Non temere, et sine causa, his castellis munitis, nomina dederunt, sed, vel a situ, et natura locorum, vel a iugis montium, vel a vallibus, vel siluis locisque, vel fluuiis denique praeterfluentibus, et in primis ab appellatione et memoria vrbium, in patria sua relictarum, desumpta, iis tribuerunt.

### §. XIII.

Sunt quidem, quod negare non possum, qui, ante Henrici Aucupis tempora, vrbes munitas in his terris a Sorabis conditas esse, scribunt, ex quibus PETRUM ALBINUM produco, qui, in Chronico Misniae n) plurima oppida Misniae a Sorabis exstructa esse, arbitratur. Profert eo consilio nomina vrbium, ex lingua Venedorum, siue Soraborum, orta, vt sententiam suam confirmet, nimirum, Lipiz, Zitiz, Rochliz, Coldiz, Chemniz, Deliz, Lobeniz, Skudiz; item Doblin, Mogelin, Wurzin, Nuffin, Korin, Stolpin, Mislin, Dalin, Lutzen, Turgowe, Pirnowe, Zwickowe, Pegowe, Strelowe, Tschow, et alia. Ex his tamen nominibus Venedorum demonstrare non potest commemoratus Albinus, haec loca omnia fuisse oppida, a Sorabis condita et munita. Nihil enim erat tum temporis, quod incrementum amplis et munitis vrbibus, prout nostra aetate videmus, daret. Non aderat merciorum frequentia, non inhabitatio illustrium hominum, quorum vita delicata, et mollitie affluens, attrahit opificum artificumque manus. *Zupanis*, siue *pagus*, potius haec data sunt nomina, ex quibus postea *Burgwardia*, ea aetate sic dicta, sunt orta, quibus praecipua castella, vel praefecturas, denotabant, ad quae Burgwardia tractum pagorum circumiacentium refe-

n) Tit. XI. p.  
155. conf. tit.  
VIII. p. 90.



referebant. Id quod antiquissima Diplomata testantur, quae apud Meibomium, Tomo primo scriptorum, et Sagittarium, in antiquitatibus Archiepiscopatus Magdeburgensis, leguntur. Eiusmodi *pagos* Misniae triginta quatuor, et *Burgwardia* quadraginta, recensent clarissimi Collectores spicilegii curiosi Saxoniae superioris. o) De *Schidinga*, Thuringiae vrbe, ad Vn-  
 structum sita, antiquissimi quidem scriptores, *Gregorius Turo-* o) Part. 1.  
§. 78.  
*nenfis*, Libro tertio Historiae Franciae, p) itemque *Witichin-* p) cap. 4. et  
7.  
*us Corbeienfis*, Libro primo Historiae, testantur, a Saxonibus, hos fines ingredientibus, occupatam fuisse; sed celeberrimus *Conringius*, in dissertatione de vrbibus Germanicis, supra laudata, oppidum, pro more illius seculi, nullis moenibus cinctum fuisse, contendit, quod exemplo Würzburgi declarat. Si enim in Thuringia, vel Misnia, vrbes munitae existissent illa aetate, Carolo magno, Romanorum Imperatori, et Carolomanno, aliisque, qui, has ingressi oras, Sorabos sibi tributarios reddiderunt, obsidendae et expugnandae fuissent. At enim vero, scriptores rerum Saxonicarum aevi medii, qui, facta Caroli, et successorum, accurate consignerunt, nihil quicquam de munita, vel expugnata, in Misnia vrbe, commemorant. Et cum non nulla describunt loca, ea vel *castella*, vel *vicos nobiles*, fuisse, existimandum est. Ditmarus Merseburgensis demum incipit recensere vrbes Misniae ab Henrico Aucupe exstructas, murisque cinctas, et inter eas *Misnam*, *Quedlinburgum*, et *Merseburgum*, qui auctor, fide dignus, priores a Sorabis exstructas, et vel a Carolingis, vel Henrico Aucupe, postea expugnatas, vrbes non praetermisisset, si vllum earum vestigium deprehendere licuisset.

## §. XIV.

Sed, ex Witichindi Corbeienfis Annalibus, de cuius auctoris fide in Historia nemo facile dubitat, in primis illi producunt urbem *Grunam*, vel *Gronam*, qui vrbes in Dalemincia, ante Henrici Aucupis tempora, a Sorabis conditas fuisse, statuunt, eamque ab hoc Imperatore, Soraborum victore, anno DCCCCXXVIII. superatam esse et euerfam, contendunt. Verba Witichindi ita habent: *Cumque Henricus, illa vrbe*  
*(Brenna-*

(*Brennaburg*) positus, signa vertit contra *Dalmatiam*; et obf-  
dens urbem, quae dicitur *Grona*, vigesima tandem die cepit  
eam. Praeda urbis militibus tradita, puberes omnes interfecti,  
pueri et puellae captiuitati seruatae. Posthaec *Pragam* adiit  
cum omni exercitu, *Bobemorum* urbem, Regemque eius, in dedi-  
tionem accepit. His verbis vera scripsisse *Witichindum*, omnes  
et singuli quidem fatentur scriptores; de vera autem lectione  
*Gronae* maxime inter se dissentiunt, et multi, nostra adhuc ae-  
tate, disputant, dubitantes, an genuina sit lectio, cum *Grona* urbs  
ad *Daleminciam*, siue *Dalmantiam*, ab hoc scriptore refera-  
tur. Clarissimo quidem *MEIBOMIO*, in notis ad *Witichin-*  
*dum*, *Grona* placet, addit tamen in notis: *Vrßpergensis legit*  
*Grana*, et quaedam exemplaria habent *Kietni*, quaedam *Kies-*  
*ni*. *Albertus Cranzius*, in *Saxonia*, *Meibomio* accedit, et *Gro-*  
*nae* lectionem praefert. *Sigebertus* vero *Gemblacensis*, de hac  
*Henrici* expeditione scribens, *Ganam*, urbem, ab eo deuictam  
esse, inquit: *Henricus, Rex, Ganam, urbem Dalmatiae (Dal-*  
*manciae) cepit, et Dalmatis (Daleminciis) tributum imposuit.*  
Illustris *GODOFREDVS GVILIELMVS LEIBNITIVS* aucto-  
ritatem quidem *Sigeberti* magni aestimat; dubitat vero, eum  
hoc loco *Ganam* intellexisse, eaque de causa, in introductione  
scriptorum *Brunsvicensium*, affirmat, aliam urbem in *Dale-*  
*mincia*, ad *Muldam* sitam, notari. Clarissimi auctores spicile-  
gii superioris *Saxoniae* urbis *Ganae* lectionem probant, ad  
fluvium eiusdem nominis sitae, verbis *SIGEBERTI* commo-  
ti. q) Quia vero in *Dalemincia* antiqua nullum urbis *Ganae*  
nomen et vestigium apparet usquam, et pagus iste, qui, nostra  
aetate, *Gana* adhuc dicitur, nihil ostendit, ex quo de urbe,  
olim ibi posita, iudicari queat, ego de hac lectione pariter  
dubito. Hac deceptus videtur *ERASMVS STELLA*, alias  
*Struler* dictus, artium liberalium et *Medicinae* Doctor, Pro-  
consul et Physicus ciuitatis *Cygneae*, in carmine heroico, cui  
nomen *Molbii* dedit, et arces, oppida, fana et iuga, describit,  
quae rapidus *Molbius*, siue *Molda*, ambit, qui *Grimam* primis  
temporibus *Ianam*, a bicipitis *Iani* templo, ibi posito, postea  
vero, ex furore *Caesaris Henrici*, quo in delendo pertinaci  
populo *Sorabico*, eorumque muris et templis diruendis, usus  
est,

q) Part. III.  
P. 377.

est, *Grim*, siue Grimam appellatam esse, prodit. r) Ex quo r) *Tom. III.*  
 vero auctore, et ex quibus documentis, haec hauserit *STEL-* *scriptor. rer.*  
*LA* praedictus, non addit. Versus eius Heroicos hic repe- *Misnic.*  
 terem, si metri et dictionis elegantia se commendarent. TEN- *Menck. pag.*  
 ZELIVS existimat, in Codice Dreisdensi MSto hanc Witi- *2050.*  
 chindi urbem *Kietni* appellari, et *Cöthenam*, oppidum Anhal-  
 tinum, intelligi. s) Celeberrimus BECMANNVS huic etiam *s) vid. Tom. I.*  
 sententiae, in Historia Anhaltina, quam insigni labore et in- *script. Brsw.*  
 dustria confecit, inhaeret, et oppidum Anhaltinorum *Cöthen* *Leibniz. p.*  
 a Witichindo notari, putat, ductus partim nominis convenien- *55.*  
 tia, partim ratione situs, partim etiam, quod multa hominum  
 ossa, in tractu isto reperta, cladis ingentis argumentum fac-  
 ciant. t) GEORGIUS FABRICIUS *Chietna* ex verbis Witi- *t) Hist. An-*  
 chindi eruit, et *Gietbanam* vel *Geitham*, intelligendam scribit. u) *halt. Lib. 4.*  
 Sunt adhuc alii, qui *Gietnam*, siue *Gietanam* ab Grona diuer- *Part. 3. c. 1.*  
 sam fuisse, arbitrantur, vel, cum SPANGENBERGIO, x) *u) Orig. Sax.*  
*nach* legendum clamitant. *p. 114.*  
*x) in Chron.*  
*Henneb. p. 71.*

## §. XV.

Qui omnes iam commemorati auctores quamvis se rem  
 acu tetigisse, et veram Witichindi verborum sectionem e te-  
 nebris in lucem protraxisse, existiment; adsunt tamen alii,  
 insigni rerum scientia et auctoritate praediti rerum Misnica-  
 rum scriptores, qui diuersam ab iis sententiam fouent, et  
*Grunam* ex Witichindi verbis formant, et locum infra Ile-  
 burgum, nostra aetate hoc nomine gaudentem, sub clientela  
 Generosissimi Domini a Dieskau, intelligunt. Inter quos pri-  
 mo loco nominandus est MATTHAEVS DRESSERVS, qui,  
 in Libro *de urbibus Germaniae*, \*) Henricum Aucupem *Gru-* \*) p. 41.  
*nam*, infra Ileburgum, ad Muldam, Sorabis ereptam, in suam  
 redegisse potestatem, scribit. Post hunc audiendus est PE-  
 TRVS ALBINVS, qui, in Chronico Misniae, Titulo VIII \*) p. 95.  
 Henricum Aucupem Soraborum castellum, *Gronam* dictum,  
 infra Ileburgum, graui obsessione cinctum, expugnasse, com-  
 memorat. Quam sententiam Titulo vndecimo \*) iterum \*) p. 145.  
 C mutatur

mutat, et dubitat plane, Witichindum *Grunam* prope Ileburgum intellexisse, his verbis: *wiewohl es andere von irgend einer Stadt, so besser droben in Meissen, an dem Wasser Gana vielleicht, gelegen, welches Orts den die Dalemencii geseßen seyn, wollen verstanden haben.* IOH. CONRADVS CNAVTHIVS, in Chronico Cellae veteris, *Gronau*, vel *Grunau*, vrbem, ab Henrico Aucupe deuictam, infra Ileburgum quoque

y) Part. VI.  
p. 61. 62.

ponit, y) probatque, Ditmarum Merseburgensem eius quidem mentionem fecisse, de situ vero nihil certi statuisse. His adiungendus est M. IEREMIAS SIMON, qui, in Chronico Ileburgensi, totam se rem confecisse, veramque Witichindi lectionem inuenisse, putat, cum ex magno vrbium feralium numero, *Grunae*, in Discauiensi praedio, aliquot abhinc annis, repperito, colligit, vel castellum ibi, vel vrbem Soraborum copiosam, multisque hominibus affluentem, olim extitisse, et nostra adhuc aetate, turrim. munitissimam egregiae altitudinis, eo in loco conspici, de eaque vulgi opinionem esse, quod ante natum Christum sit exstructa. z) Cuius sententiae CHRISTIANVS HENRICVS WEISIVS, in antiquitatibus Misnicis, FRIDERICVS STRVNZIVS, in Dissertatione de Dalemencia, et M. FRENZELIVS, in Disputatione de Ileburgo, alique, accedunt.

2) p. 10. 11.

## §. XVI.

Quoniam vero ex supra adductis Witichindi verbis patet, *Grunam*, de qua disputatur, in *Dalemencia* sitam, ab Henrico Aucupe superatam et dirutam fuisse: Ileburgum contra ad pagum Dalemenciae a Sorabis nunquam relatum esse, qui pagus non ad vrbem Wurcenam, nedum Ileburgum, se extendebat, id quod ex descriptione pagorum, a Sorabis Venedis cultorum, constat, quorum nomina auctores spicilegii Saxonici nobis exhibent; \*) sequitur omnino, hoc castellum, vel hanc vrbem *Grunam*, in Dalemencia quaerendam esse, vt Witichindus scribit. : Qua de re illi, qui rectius accuratiusque antiquam Soraborum Geographiam perquisuerunt, non

\*) p. 374.  
Part. 3.

*Gru-*

*Grunam*, sed *Grimam*, in Dalemincia sitam, a Witichindo notatam, statuunt. Princeps horum est ZACHARIAS SCHNEIDERVS, sedulus antiquitatum Misnicarum indagator, qui eo maiorem meretur fidem, quo meliorem monumentorum publicorum copiam, ex tabulario publico, ad manus habuit. Hic cum urbem Soraborum, a Witichindo Corbeienſi descriptam, in pago Dalemincia sitam legeret, neque tamen, in hoc pago, *Grunam*, sed *Grimam* deprehenderet, facile animaduertit, quod *Gruna*, pro *Grima*, a scriptoribus corrupte expressa sit. Ita enim, in Chronico Lipsienſi, inquit: \*) *Es bat leicht- lich geschehen können, daß das erste Strichlein vom Buchstaben m zum i gezogen, und aus Grima Gruna gemacht worden.* Quam lectionem in primis probat celeberrimus DAVIDES PEIFFERS, Ictus, exquisitissima doctrina, et longo rerum usu, aeternisque in Rem publicam Saxonica meritis celeberrimus, qui, in Lipsia, siue Libris quatuor originum Lipsiensium, inquit: \*) *Erat in Sorabia oppidum ad Muldam amnem, Grima, satis, ut in illa aetate, situ et munimentis tutum.* Ad id exercitum Henricus admouens, castra prope portas locat. Sorabi, qui in oppidum, quantum diutinae obsidioni tolerandae satis esse putarent, frumenti ex agris conuexissent, telaque, arma, et cetera parassent, in Imperatoris conatus, variis animis, illudere, militem Germanum probris de vallo onerare, et minis increpare contemptum irrisumque. Id Imperator aegre passus, nec petulantiae impunitatem ad hanc urbem, sed ad summam vniuersi belli pertinere ratus, omnem capti oppidi praedam pro concione edicit, militum fore: Scallas ad expugnationem parari, paratas electis per manipulos viris diuidi, mox ferri, iisque erectis applicatisque ascendere, et vi summa multis simul partibus aggredi vallum iubet. Milites tam obsecrorum insolentiam vlciscendi, quam diripiendi oppidi ardore incensi, vbi signum est datum, ingenti clamore, ab omni parte, ad vallum subeunt, tantoque conatu et tumultu adeo atroci coepta oppugnatio, oppidanos, terrore repentino, et vndique circumfuso, ita amentes fecit, ut animis alio avertis, neque arcere tot locis transcendentium vim, neque

que certatim iam inuadentium impressionem sustinere diutius possent. Quo vero magis vallo deturbati deiectique propugnatores instantibus Germanis cedebant, eo maior terga vertentium caedes erat, donec omnibus, quos fors victoribus armatos obtulisset, trucidatis, oppidum, vigesimo die, quam obsessum fuerat, captum, et post direptionem, euersum, penitus fuit. In sequenti anno Sorabos Lusatios et Boëmos reparasse bellum, quidam scribunt, quos Imperator, copiis in aciem eductis, tanta strage ceciderit, ut ille ultimus ipsis dies fuerit, signa cum Germanis conferendi, Boëmis, qui inter auxilia Sorabica fuerant, ad vnum omnibus post victoriam interemtis. Quibus auctoribus, fide dignis, ut accedam, quod nimirum *Grima*, non *Gruna*, Soraborum vrbs, ab Henrico Aucope sit superata, Chronicon MStum Grimense, antiqua scribendi ratione, et vetustis literarum ductibus, confectum, me in primis mouet, in quo statim ab initio scriptum legitur: *Die Sorben Wenden haben im Anfange hier an der Mulda ein Schloß angelegt, so Grim genannt worden.* Quae appellatio si ex Soraborum lingua rite examinatur, et cum Tartarorum vocabulo, his temporibus adhuc vsitato, confertur, qui castellum, siue locum munitum, *Krim* vocare solent, ut PHIL. IO. STRahlenbergivs, in Geographico Opere Russiae, Siberiae et Tartariae, obseruat; quilibet per se facile diiudicabit, quod a Witichindo Corbeienfi ex Soraborum lingua *Grima* potius, quam *Gruna*, posita sit.

### §. XVII.

Longe alia vero *Gruna* vel *Grona* fuit, de qua pariter *Witichindus*, in Annalibus Saxonis, commemorat, quae Henrico, Duci adhuc Saxoniae, tum temporis periculosa admodum fuit, cuius praesidio a Conrado primo, Caesare Romanorum, aliquamdiu inclusus quidem, et ab Eberhardo, Francorum Duce, obsessus, sed Thiatmari, siue Ditmari, astuto consilio liberatus, et postea in gratiam a Conrado receptus, eiusque successor declaratus fuit. De qua re multa habet ce-  
leber-

leberrimus *Siruius*, in Corpore Historiae Germanicae. \*) *pag. 213.*  
 SCHATENIUS, in Annalibus Paderbornensibus \*) de hac Grona- *lib. 3. p. 248.*  
 na, inquit: Etsi alii Gronauiam, ad Lenam fluvium, in Hilde-  
 siensi Dioecesi, alii Groningam, in Halberstadiensi tractu, in-  
 terpretantur; certius tamen ad Visurgim in solo Westphali-  
 co Grona traditur, vbi modo arx Gronda conspicitur, quon-  
 dam episcoporum Hildesiensium possessio, nunc Brunsvicen-  
 sium. Vrpergensis et Crantzii Gruonam: Diplomata ce-  
 tera Gruonaham vocant, qui locus olim celebris Imperato-  
 rum accessu fuit.

§. XVIII.

Sed vt ad *Grimam* reuertar: satis quidem ex supra di-  
 ctis constat, Sorabos Venedos primos huius castelli, in Dale-  
 mincia, conditores fuisse; multo tamen claritis euidentiusque  
 ex nominis et appellationis huius exploratione id patebit.  
 Vnum vero obstare videtur: quod nempe Witichindus Cor-  
 beienfis, verbis, saepius citatis, *Grimam* urbem appelliter, et,  
 in Chronico M<sup>to</sup> Grimenfi, contra, de quo iam dixi, ca-  
 stellum dicatur. Oritur proinde quaestio: vtrum Sorabi  
 prius urbem, an castellum, hoc in loco, condiderint? Quan-  
 tum ex consuetudine illorum temporum, et moribus huius  
 populi, conicere licet, statuo: castellum, cuius, in Chronico  
 citato, expressis verbis fit mentio, prius in monte, proxime  
 Grimam, cis Muldam, sito, ex quo omnes fere aedes, et vici  
 vrbis huius, conspici possunt, Sorabos exstruxisse, ex eo-  
 que vrbi, in valle ad fluvium positae, nomen postea dedisse.  
 In hoc monte, nostra adhuc aetate, rudera et vestigia legun-  
 tur, ex quibus colligere licet, castellum ibi exstructum, et  
 sine dubio *Burgwardium*, temporibus Saxonum, sub auspicio  
 Henrici Aucupis Soraborum fines inuadentium, fuisse, quia  
 ab omnibus etiamnum *der Burgberg* appellatur, et, hoc tem-  
 pore, ad praedium Doeringianum pertinet.

## § XIX.

Vnde vero nomen *Grima*, in Soraborum lingua, originem traxerit, et quid hoc ipso indicare voluerint populi illi, de eo multae variaeque iam olim Virorum doctissimorum, IOACHIMI CAMERARII, ADAMI SIBERI, GEORGII FABRICII, aliorumque, fuerunt sententiae. Nostra quoque aetate non omnes de hac re inter se consentiunt. LAV-

7) Part. II.  
Poliograph.  
P. 74.

RENTIVS PECCENSTEINIVS \*) a Venedorum vocabulo *Chrem*, implorare, flagitare, orare, originem trahere, existimat, eo, quod ibi idolum, in ponte, super Moldam extructo, habuerint lapidi incisum, longoque tempore id religiose coluerint Sorabi, sub imagine Iani bifrontis. Producit, ad sententiam suam confirmandam, distichon doctissimi Poëtae, in memoriam huius superstitionis confectum:

Vrbs antiqua iacet, veteres dixere furorem,

In qua bifrontis templa fuere Dei.

A cremando qui deducendum Grimae nomen existimant, quod saepius igni cremata sit, vel singulis annis Idolo *Zorneuizio*, Soraborum quasi *lamini*, Sorbenwiz, hoc in loco erecto, et religiose culto, viuum hominem cremauerint, eumque per ignem in coelum transmiserint, sacra quidem, a Sorabis iis temporibus observata, hoc modo commemorant; sed cum tecum rite reputauerint illi, hos Sorabos Latinae linguae plane imperitos fuisse, ab hac sententia facile discedent. De hac hominum immolatione, tum temporis visitata, disserit GEORGIUS SPALATINVS, in Libro, de rebus gestis Soraborum in Misnia, inquit: Soraborum constans fuit sententia, Daemonia sanguine humano placari posse, eaque de re Sacerdos Zorneuizius persuadebat eis: quotannis huic idolo hominem, cuiuscunque fortis, dicandum esse. Quid de REINERI REINECCII habendum sit sententia, qui huius urbis appellationem ab Italiae oppido, *Cremona*, deducendam putat, per se quilibet iudicare poterit. Qui a voca-



vocabulo Rufforum, *Gremitz*, hoc nomen deriuandum suadent, quod *Echo* notat, quia montes Grimae circumiecti, petraeque, quantamcunque accipiant, vocem, multiplicato sono, reddunt, meris coniecturis indulgent, ex quibus nihil certi probari potest.

## §. XX.

Rectius meliusque mihi sentire videntur illi, qui huic loco nomen a Sorabis Venedis, in memoriam *Chremae*, insignis Tartariae oppidi, quod antea in patria sua obtinuerunt hi populi, per migrationem vero in Hermundurorum fines, dereliquerunt, inditum esse contendunt, in quorum numerum est referendus *GEORGIVS FABRICIVS*, felicissimus originum Saxonicarum conditor, id quod de eo *PECCENSTEINIVS*, in Theatro Saxonico, obseruauit. \*) Multis omnino \*) *Pollogr.* locis, pagis, et castellis Sorabos, has oras ingressos, nomina, *P. 73.* in memoriam locorum, quae in Sarmatia et Tartaria olim inhabitauerant, imposuisse, iam supra a me dictum et demonstratum est. Nonnulla iam proferam, vt rei veritatem quisque videat. *CONSTANTINVS PORPHYROGENNETYS*, de administrando imperio, oppida Seruiorum vel Soraborum enumerat, quae in Croatia olim tenuerunt, vt *Dresneck*, *Lesneck*, *Salenes*, *Dalen*, *Stolpun*, *Cori*, et alia. Quis negabit loca, castella, et tandem oppida, in his oris condita, iisdem nominibus, in memoriam pristinorum, insignata esse, vt *Dresen*, postea *Dresden*, *Leisnig*, *Selniz*, vel *Seliz*, *Dalen*, *Stolpen*, *Köhren* etc. Multa alia praetereo, \*) quae, in Historia Soraborum, a clarissimis auctoribus spicilegii curiosi Saxonici \*) sunt ob- \*) *Part. II.* seruata. *P. 132.*

## §. XXI.

Pari modo ex *Krim*, vel *Crimea*, oppido satis celebri, quod Seruii in Tartaria, primis temporibus, inhabitauerunt, et nostra aetate in Tartaria minori adhuc inuenitur, ex quo *Tartari Crimenses* appellantur, huic loco etiam nomen imposue-

posuerunt, eaque de causa *Crym* a *Brorufio*, vel *Grym*, etiam *Grim*, vel non raro ciuitas *Grimis*, in antiquissimis Diplomati-  
 bus, passim citatis, nominatur. Vastationem et euerfionem  
 huius castelli, sequentibus temporibus susceptam idem chro-  
 nicon MStum Grimenfe, §. XVI a me citatum, ad annum mil-  
 lefimum, post Christum natum, commemorat, et confir-  
 mat, quod, cum iam diu receptaculum praedonum fuisset,  
 ab Ottone tercio, Imperatore Saxone, (non Friderico I. vt  
 alii volunt, vtpote qui imperio, hoc anno, nondum prae-  
 fuit) oppugnatum et disiectum fit, his verbis: *Im Jahr  
 1000 nach Christi Geburt ist das Schloß zwischen Grim und dem  
 Dorf Höhnstet gelegen in Hengberge, welches eine lange Zeit  
 eine Festung und Aufenthalt der Räuber gewesen, vom Key-  
 ser Otto, dem dritten belagert, zerstörct, und zerbrochen  
 worden.*

## §. XXII.

Dubitandum igitur non est, *Grimae* nomen a Sorabis  
 ortum, et a Saxonibus, post tempora eorum, cum in has  
 terras peruenerunt, reseruatum esse. Cum enim hi populi,  
 inter Albim et Salam habitantes, suis non contenti regio-  
 nibus et sedibus, vicinam Thuringiam et Saxoniam inuade-  
 rent, omnia pro lubitu agerent, multaque loca deuastarent  
 et diruerent, Carolus, Imperator Romanorum, virtute et  
 rebus gestis Magnus appellatus, coniunctis Francorum et Sa-  
 xonum viribus, conatus eorum reprimere studuit. Et cum  
 ipse Imperator, multis aliis rebus tum temporis districtus,  
 huic bello contra Sorabos Venetos interesse non posset, fi-  
 lio, Carolomanno, rerum summam commisit, qui, omni fe-  
 licitate, cum his populis pugnavit, et, Duce eorum, Mi-  
 loducho, occiso, castellisque praecipuis, et pagis, ad Sa-  
 lam et Albim, in potestatem redactis, victor domum rediit,  
 liberaliterque a Patre fortissimo acceptus est, id quod ex  
 Eginhardo, Monacho Engolismensi, Alberto Stadenfi, Poë-  
 ta Saxone, Annalibus Saxonicis, aliisque scriptoribus et do-  
 cumen-

cumentis perspicere licet. Et cum non raro Sorabi, licet debellati, Saxonibus denuo repugnarent, seque iis opponerent, Ludouicus pius arma iterum contra eos sumsit Imperator, Saxones in has regiones misit, qui in hac expeditione bellica felices fuerunt, et omnes eorum prouincias et partes occuparunt, de qua re Annales Fuldenses, ad annum 897 testantur. Cum vero, seculo sequenti, iterum fidem datam frangerent Sorabi Slaui, et rebellarent, Hunnosque, per Italiam et Germaniam vagantes, in partes suas traherent contra Saxones, Otto, Dux Saxoniae, Henricum, filium, Aucupem dictum, cum exercitu instructo in fines Soraborum abire iussit, vt hunc populum admodum rebellem subiugum mitteret, et loca eorum munita, et, inter haec, quoque *Grimam*, in Dalemincia, euerteret. Quod cum ex voto succederet, Henricus breui post inducias prius cum Hunnis, qui a Soraborum stabant partibus, per nouem annorum spatium, fecit, et interea oppida, in his oris, exstruenda et munienda curauit, vt Quedlinburgum, et Merseburgum, quod muro cinxit, contra Milcienorum vero inuasionem, Misena castellum condendum iussit, id quod ex Ditmaro Merseburgensi, antiquissimo rerum Misnicarum conditore, constat, qui ait: \*) *Imperator, Henricus, montem, iuxta Albim positum, et arborum densitate tunc occupatum, excoluit, ibique ar-* <sup>10.</sup>  
*cem, propugnaculum, nec non urbem statuens, eidemque de*  
*riuo quodam, qui in parte Septentrionali fluit, nomen Misna*  
*imposuit, quam, vt nunc in usu habetur, praefidii, et aliis*  
*impositionibus muniuit, vt ex ea Milcienos, suae subactos ditioni,*  
*ensum persolvere, cogeret.* Atque hoc modo Sorabos, tributarios factos, partim in fidem recepit Imperator, partim eiecit, et Hungaros, qui a Sorabis in subsidium vocati erant, vt supra dictum, et, loco tributi, ab Henrico canem villaticum, auribus mutilatum, et scabie sordidum, receperant, ingenti clade, ad Merseburgum, deleuit, de quibus omnibus Witichindus, Hermannus Contractus, Sigebertus Gemblacensis, et alii, testantur.

D

§. XXIII.

## §. XXIII.

Quibus rebus feliciter confectis, toti Germaniae, et in primis Misniae, noua lux affulsit, et Henricus victor compluribus in ea exstruendis vrbibus operam dedit, et vere Theseus Saxonicus factus. Vt enim hic Athenienses, ita ille Saxones, et alios Germanos, ex agro in vrbes conditas compulit, vrgentibus Hunnorum irruptionibus, ab iis iterum susceptis, quo miseris tutus daretur receptus. Nonus quisque, ex instituto illius, ex agro in urbem migrare iussus est, quibus singulis victus ab iis, qui in agro remanserunt, suppeditatus est, vt rebus, in vrbibus rite instituendis eo melius vacarent. Quod institutum Witichindus Corbeienfis exponit, inquires: \*) *Henricus, Rex, recepta pace ab Ungaris ad nouem annos, quanta prudentia vigilauerit in munienda patria, et in expugnando barbaras nationes, supra nostram est virtutem, edicere. Et primum quidem ex agrariis militibus nonum quemque eligens, in vrbibus habitare fecit, vt ceteris consamiliaribus suis octo habitacula exstrueret, frugum omnium tertiam partem exciperet seruaretque, ceteri vero octo seminant, et metent, frugesque colligerent nono, et suis eas locis recondent. Concilia et omnes conuentus, atque conuiuia in vrbibus voluit celebrari. In quibus exstruendis die nocteque operam dabant, quatenus in pace discerent, quod contra hostes in necessitate facere debuissent. Vilia, aut nulla extra vrbes fuere moenia.*

\*) Lib. I.

## §. XXIV.

Originem igitur Grimae, de qua dixi, si a Sorabis deriuandam, et, sub Henrici Aucupis imperio, vna cum arce, postea munitam amplificatamque dixerò, nemo me iure reprehendere poterit. DITMARVS quidem Merseburgensis, qui, inter omnes, auctoritate valet, mentionem eius non facit; quia tamen Henricum Merseburgum muro lapideo cinxisse, ibidemque templum fecisse, et ceteras quoque vrbes, ad salutem imperii, et sana in his, ad Dei laudem, condidisse, scribit, Li-  
bro

bro primo; \*) a vero minus aberrauero, si *ceteris urbibus* \*) pag. 318.  
*Grimam* quoque contineri existimem. Et sicut annum illius  
seculi silentio praeteriit idem Ditmarus, quo Merseburgum  
ab Henrico muro cinctum est: ita nemo facile de aliis urbi-  
bus, et pariter *Grima*, certi quicquam statuet, quo anno  
huius seculi a praedicto Imperatore haec vrbs muniri et am-  
plificari coepta sit. In Chronico MSto, saepius citato, con-  
signatum inuenio, Henricum, ante praelium, ad Merseburgum,  
cum Hunnis ineundum, milites suos, prope *Grim*, ad Mul-  
dam, instruxisse, et, hac pugna feliciter pugnata, eo rediisse,  
sedemque ibi fixisse, de qua re etiam PECCENSTEINIVS,  
in Theatro Saxoniae, nonnulla \*) commemorauit. Quae vi- \*) Part. II.  
ctoria ergo Henrici si iuxta Sigebertum Gemblacensem, an- p. 31.  
no DCCCCXXXII deportata fuit, facile exinde colligen-  
dum est, hanc urbem, eodem anno, ab hoc Imperatore muni-  
tam et auctam esse. In annalibus urbis, Misenaë, GEORGIVS  
FABRICIVS ex multis numis argenteis, inter *Grimam* et Lau-  
figan, in pago, Bardo minore, sub terra, inuentis, effigiem  
Henrici, dextra manu auem tenentis, repraesentantibus, con-  
iicit: hunc Imperatorem urbi *Grimae* incrementa dedisse.  
Sed ex numis, cum Principis imagine dextra manu alitem ge-  
stantis, non semper iudicari potest, Henrici Aucupis fuisse.  
Alii quoque Principes, venationes et aucupium inter deli-  
cias reputantes, cum alite repraesentati sunt, vt sigilla, ta-  
bulae, et monimenta antiqua, testantur, de quibus STRV-  
VIVS, in Corpore Historiae Germanicae, agit. \*) Multa adhuc \*) p. 206.  
restant de hoc argumento in medium proferenda, quae, breui  
tempore, si Deus vires et facultatem, inter labores assiduos,  
concesserit, cum eruditis, antiquitatum patriae amantibus,  
libens volensque communicabo.



THE NEW YORK PUBLIC LIBRARY

ASTOR LENOX TILDEN FOUNDATION  
1



